



Komunikadu Imprensa

Periodu : Agostu 2011
Edisaun : 04 Agostu 2011

Grupu Advogadu/a Hala'ó Estudu Komparativu iha LBH APIK Jakarta-Indonezia

Durante semana ida nia laran hahu husi loron 25-29 fulan Jullu 2011, grupu advogadu/a husi Timór Léste ne'ebé mak hetan suporta husi *The Asia Foundation* (TAF) halo Estudu Komparativu iha LBH Apik Jakarta-Indonezia.

Grupu refere mai husi instituisaun diferente iha teritoriu tomak ne'ebé mak servisu durante kear papel diferente hodi asiste sidadaun sira hodi asesu ba sistema justisa formal no garantia direitus umanus liu-liu direitu feto no labarik ne'ebé afetadu husi violénsia doméstika no violénsia seksual.

Grupu ne'e kompostu husi JSMP/VSS ema nain haat feto rua no mane rua, ECM advogada nain rua, FFSO advogada nain ida no staff administrasaun ida inklui mós advogada nain rua ne'ebé hala'ó hela formasaun iha Centru Formasaun Judisial. Aliende ne'e partisipa mós representante TAF nian iha aktividadereferencia hanesan observador ba aktividade durante semana ida iha Jakarta.

Tuir Diretór Ezekutivu JSMP Luis De Oliviera Sampaio hateten katak *objetivu husi estudu komparativu ne'e maka atu hasa'e kapasidade no koñesimentu ba advogadu/a sira iha aspetu manajementu ka jestaun institusionál, nomós prosesu litigasaun inklui non litigasaun iha natureza kazu sira ne'ebé involve feto no labarik sira ne'ebé sai vitima husi violénsia bázeia ba jéneru.*

Liu tan nia hatutan katak *“agora dadaun grupu advogada feto sira halibur-an no konsolida-an atu asiste no fornese apoiu legal ba feto no labarik sira, no grupu advogada hirak ne'e tuir planu sei transforma sira nia an ba instituisaun legal ka LBH Feto ne'ebé sei espesifika sira nian hanesan grupu espelista ba asuntu feto no labarik. Tanbá ne'e“Estudu komparativu refere kria atu hasa'e koñesimentu advogada/u ida-diak liu oinsa maneja instituisaun ida no oinsa atendentu ba kazu husi perspetiva jéneru, ho nune'é bainhira LBH Feto ne'e hari'i iha ona koñesimentu ne'ebé suficiente atu hatan ba realidade hirak ne'e”.*

Aktividade ne'e la'ós vizita deit ba LBH Apik Jakarta, maibé mós vizita ba instituisaun sira seluk hanesan LBH Jakarta, KontraS, grupu paralegál no *Perlindungan Perempuan dan Anak* (PPA) iha Polisi Resort Metropolitan Jakarta Timur.

Aliende ne'e Grupu advogada ne'e mós halo observasaun iha Tribunál Distrital Sentral Jakarta hodi observa oinsa LBH APIK defende sira nia kliente iha audiénsia Julgamentu. LBH-APIK mós konvida NGO seluk hodi fahe esperensia konabá oinsa prosesu hari'i institusaun.

Iha nia konkursu Diretór LBH APIK, Sra. Veronika hateten katak *“Nia kontente ho vizita estudu komparativu ne'e ne'ebé mai husi Timór Léste nomós ba iniciativa atu hari'i instituisaun ida hodi bele suporta ba inan feton no labarik feto sira”*. Tanbá ne'e, *Nia espera katak iha futuru LBH-APIK ho Grupu Advogada sei servisu hamutuk hodi garantia justisa ba feto no labarik*.

Iha Estudu komparativu ne'e Grupu Advogada mós fahe esperensia konabá oinsa atendementu vítima violénsia bázeia ba jéneru inklui rede servisu iha Timór Léste. Iha oportunidade ne'e, husi LBH Apik mós apresia tebes ho Lei Kontra Violénsia Doméstika tanbá iha Timór Léste hatuur violénsia doméstika hanesan krime ho natureza públiku.

Atu hetan informasaun klean bele kontaktu :

Luis de Oliveira Sampaio
Diretór Ezekutivu JSMP
E-mail: luis@jsmp.minihub.org
Landline: 3323883/7295795